

楊園先生全集卷之五十一終

楊園先生全集卷之五十二

訓門人語一

門人張嘉玲敬述

癸丑正月二十八日

先生率子默斯名維來 先生云

今年以子相累當叩首辭又云為小兒叩首一人之私

也尚有公義在古人云聞善言則拜況見善行乎佩蔥

辭遠館而教子弟誠善行也當拜玲答曰玲之歸實以

續娶之故且家貧不能延師教子姪故耳何敢言善乎

先生之命蓋有所試之意敢不勉承竟辭拜 先生

作四揖而別

以下見巖溪日程

二月丁卯同

先生攻玉至震澤

先生有云中庸言素

位而行吾輩今日素位則夷狄患難貧賤自是正命若
妄想富貴便是桎梏便非正命

又云溫節孝言窮則思通富則思通甚佳

五月癸巳 先生見教云朝廷大政有三曰農政曰學政
曰軍政為人上者不可不留意

又云以約失之者鮮此句凡事皆然

甲午從 先生於桑地中耘葉去曠因言農桑無近功

先生曰唯無近功所以可長久

又曰語類中講士不可以不弘毅及顏子不遷怒不貳過
兩章最當著意玩味

又曰人不可無師友桐川先輩如程吳隱名木學於金華

故其道德文章功業名節皆卓然可觀貝清江名瓊學於

會稽故文學有聲近年李尚寶名樂有唐一庵杜靜臺為

之師友故學雖不如吳隱之醅正而立身可觀見聞雜

記一書有補於世者多錢中丞名夢歷華要有清名然

無師友故學識又不如尚寶也

又曰古法有當守者有當更者當守者如取士之用鄉舉

里選而不可用舉業授官天子止擇大官而大官各舉

僚屬不可盡歸銓政於吏部等是也當更者如楊炎兩

稅法行之已久龍子雖云莫善於助莫不善於貢然自

今觀之則莫善於貢助法恐難行又郡縣亦可治不必封建是也又問陸宣公有云賦稅各當稅其土之所有如絲綿織縞之類不當改折金錢如何曰近世行金錢殊便

十月己亥玲別攻玉肆夏從 先生道桐鄉至半邏舟中云舜典稱舜爲濬哲文明孔子曰德爲聖人孟子曰舜爲法天下可傳後世此皆稱舜之爲聖人也至其所以爲聖人者則在舍己從人好問好察取諸人以爲善聞一善言見一善行若決江河沛然莫之能禦所以人要虛心 朱子曰聖人之心至虛至明二句最宜詳玩

午間至朝陽廟造午飯因失帶茶葉茶壺見廟前有羊眼豆棚 先生命採豆花作湯過飯曰曾聞之程長年先生豆花湯能開胃啟脾

有一友人方向學而遽早世 先生曰天爵之貴踰於人爵方向學而遽早世豈此兄無福邪

辛丑從 張何二先生弔查漢園舟中 何先生云李延平每與朱子言灑落灑落非可求也功夫至到自有此境耳 先生曰教後學以憂勤惕厲猶懼弗及况敢易言灑落乎

丁未 先生至語水同飯送 先生之東寺立語云凡人

家延師師之衣服飲食主人無不細心供給而爲師者不盡心教子弟師必無後子弟之晝夜肄業師無不盡心思維而主人不盡敬其子弟必不成

十一月乙卯玲從 先生往震澤 先生讀古詩云雨腳風聲滿樹頭隨身簑笠短羊裘柴門猶道牛歸晚江上風波未泊舟

甲寅三月己巳日 先生曰近來看得道不遠人一章覺親切些道不遠人卽有物有則也故下說其則不遠註中所以爲人之道各在當人之身如云聰明在耳目慈孝在父子也改而止改字最說得切實人能弘道非道

弘人道非亡也人自外於道耳但能改其無道卽在道中矣然道實不外乎人心故云忠恕違道不遠但單說心則異端禪學皆言心可以假託故下文又言子臣弟友庸言庸行則中庸之道信乎其不遠人而非隱怪之所得假矣

又云中庸言道費而隱三字最盡刑名術數之流其於道之費處畧講究得些然不知道之隱虛無寂滅之學其於道之隱處畧窺測得些然不知道之費惟言費而隱則高不入於空虛卑不滯於形器程子又說體用一源顯微無間尤親切惟道之費而隱如此所以學者不可

不操存省察

問素位章教人反己自修意多 先生曰然看引射爲喻最妙如今人考試文章猶有自稱屈者至於射則中不中甚分明未有尤人者

問薛文清入相當英廟復辟之初想是當事者姑以答民望意曰然又問忠肅之死文清初不與聞一日入朝見眾皆衣紫公問其故或曰公不知邪今日欲刑某等耳公曰此事人所共知各有子孫石亨奮然曰事已定不必多言公知事勢不可挽所以至上前不力諫若力諫必無益於事而徒增朝廷又殺一大臣之名公蓋籌之

熟而於此卽有去志否曰想當時事勢如此又問公在相位勢不可久久則必受阼曰若久便不是道理了且不要說到受阼然是則必利非則必害理有固然所以義命拆不開

玲偶說與門人說書 先生曰最要是欲學者反身而自得之

玲問調息養病之說如何 先生曰養疾也要得時昔一友人好靜坐每日下帷坐一株香子問之曰使靜坐時弟子有戲於前者兄能不管否總之道理君子而時中最盡

玲問國家兄終弟及有三四世者廟制當如何 先生曰
古有兄弟其一廟爲昭或其一廟爲穆者似亦可行
又曰丹曙館次不愜意予勸其竟辭之爲尙

臨別又曰大舜之所以爲聖人者只是虛受文王所以爲
聖人者只是乾乾不息

五月甲戌玲至半邏見 先生先生時患脾疾甚而夜坐
凝然無歆側玲反以病不能莊坐可見有德與無德之
效矣

七月二十七日己丑至楊園 先生病甚召玲至寢榻前
片時少頃復入 先生曰予病甚此番相晤想成永訣

矣玲曰玲當明日畱此一日但玲體狼狽急於東行當
在半邏待 先生來耳 先生曰吾意亦欲汝早早東
行爲善又曰予前第二子彌月商隱贈玉玦一枚予畱
之欲待商隱生子而贈之予六十歲時商隱贈二程全
書一部予受之欲待商隱六十而贈之今商隱年未及
六十亦未生子而予病如此恐不復相見祈子爲我致
之如予親致一般

又曰企周屢以家事相商予以爲此不必相商直須自斷
之若能出則出之不能則終身受累何必更煩朋友徒
亂人意

庚寅晨進見 先生先生曰予精神接續不來玲曰玲至
半邏待 先生曰恐不能復東矣歛獻而別 是夜戌時先
生即捐館矣痛哉

楊園先生全集卷之五十二終

楊園先生全集卷之五十三

訓門人語二

門人姚瑚敬述

辛亥二月瑚上書 先生約二千餘言 先生語佩蔥兄

曰此兄太覺性急故某答書致此意 見文集 後相見時又

誨以學問之道如天之暑往寒來無驟運亦無暫停又

如雞之抱卵不急不舍則勉勉循循而自有所至矣 以下

辛亥

三月四日瑚同弟至語溪力行堂候 先生先生訓以為

學當祖述孔孟憲章程朱諳諳數十語瑚問日用工夫

非助即忘幸 先生教之 先生曰要知必有事焉孟